

Abdullah terima dua anugerah tertinggi Indonesia

UM-22/2/2007.

JAKARTA 21 Feb. - Datuk Seri Abdullah Ahmad Badawi tiba di sini tengah hari ini bagi lawatan kerja dua hari termasuk menerima anugerah tertinggi Indonesia untuk pemimpin luar dan anugerah tertinggi pergerakan pramuka, iaitu pengakap Indonesia.

Anugerah tertinggi daripada pemerintah Indonesia itu, Bintang Republik Indonesia Adi Pradana merupakan anugerah tertinggi yang pertama kali diberikan kepada Perdana Menteri Malaysia.

Begitu juga anugerah pramuka Lencana Tunas Kencana yang merupakan yang tertinggi pernah diberikan kepada tokoh yang banyak berjasa kepada pergerakan pengakap.

Duta Besar Malaysia di Indonesia, Datuk Zainal Abidin Mohamed Zain berkata, Presiden Indonesia Susilo Bambang Yudhoyono akan menyampaikan bintang Adi Pradana kepada Perdana Menteri pada satu majlis di Istana Merdeka di sini pagi esok.

"Bintang tertinggi ini belum pernah diberikan kepada mana-mana pun Perdana Menteri Malaysia sebelum ini... yang menerima (ialah) penganugerahan lain," katanya kepada pemberita di sini hari ini.

Zainal Abidin berkata, sebelum majlis penganugerahan itu, Abdullah akan melakukan kunjungan hormat ke atas Susilo di Istana Merdeka.

Selepas majlis itu, Abdullah akan ke Dewan Persidangan Birawara di Jalan Gatot

Subroto di sini untuk menerima Lencana Tunas Kencana, yang akan turut dihadiri para pemimpin pengakap Malaysia dan pramuka Indonesia.

Sementara itu, Abdullah ketika berucap pada majlis jamuan malam Pengakap Kelana Indonesia bersama Perdana Menteri, malam ini berkata, kerjasama Pengakap Malaysia dan Pramuka Indonesia telah memberi makna lebih mendalam dan memperkukuhkan lagi hubungan antara rakyat sempena 50 tahun terjalannya hubungan diplomatik kedua-dua negara.

Menurut Perdana Menteri, beliau gembira pergerakan Pengakap dan Pramuka kini menjadi jambatan meningkatkan lagi hubungan sesama rakyat yang terjalin sebaik sahaja Malaysia mencapai kemerdekaan.

"Jambatan ini ialah jambatan persahabatan yang diwujudkan oleh Pengakap dan Pramuka," katanya disambut tepukan gemuruh lebih 300 anggota pengakap.

Pada majlis itu, Abdullah yang juga Presiden Agung Pengakap Malaysia merasmikan penubuhan Pengakap Kelana luar negara, dengan menyerahkan bendera Pengakap Kelana kepada Duta Besar Malaysia yang juga Ketua Pengakap Negeri cawangan Indonesia selain menyempurnakan pelantikan Pesuruhjaya Pengakap Kelana di Indonesia, Dr. Junaidi Abu Bakar, yang juga pengarah Jabatan Penuntut Malaysia di Indonesia.

Setakat ini, 120 pelajar perubatan Malaysia di Jakarta menyertai Pengakap Kelana.

- Bernama